

À CHAKE SI VÛSION DÈS SAÏSONS...

Li brouyârd dau matin fwârt contrariant
Pèse come on linçoû su nos pôvès spales.
L'ârière-saïson nos ramine si swasse gale,
Si bladjet èt aîwis' masse aflidjant.

'I a v'nu abîye li laîd timps dè frèchs brèyadjes.
Dins lès bwès t't-autoû lès côps pètenut,
Lès tchins, lès-omes, lès trompètes brûtîyenut,
Po l' gros jubier, c'è-st-on tèrîbe daladje.

Li vîye clotche qui ridougne ni dègnetéye pus l' minme.
Si batant prêtche dè fwârts coûtès djoûrnéyes,
Po totes lès fleûrs lès prumêrès djaléyes
Èt do solia rin qu' po lès crisantinmes.

Afîye, au lon, on bia grand aube stocasse,
Galiârd èt rwèd tigneûs, aude si fouyadje,
Qui l'ôr, l'èrignûre d'awan èt l' bronzadje
Auyenéyenut l' tauvia di s' bwagne tignasse.

Là qu'octôbe li trosse abîye viè l' tossint.
Qu'a todi fièsté, lèye, su nosse vîye bole,
Lès pôves come lès cis qu'ont couru l' glôriyole
Èt scrîre leû nom su l' cayau ou l'ârdjint.

Si-t-oteléye su s' dos, trin.nant s' vî baudèt,
Arive tot bèlotemint sint Nicolès
Qui l'èfant èdwârmu dins si p'tit lèt
Sondje à ç' qui lî va mète dins sès solès.

L'awan rafrinci a portant s'-t-atraît,
Come li côp d'ouy qu'on tape su one saquî :
Rigârd amichtauve ou frêd qui rèlît
Lès paujêres bias mwès dèss cias contrèfaîts.

Ca, lès fleûrs ont lèyî là leûs-ôrrîyes,
Rindu al tête leû biaté, leû agrès
Èt d' doû, tot ç' qu'èst bia a pièrdu s' catchèt,
Mins, sûr qu'one sawouce, li ciél si rafîye.

Pierre Lazard

Oct.2012